



KOPERASI ADIK KAKAK KAMPUNG PULAU RUSA KUALA TERENGGANU BERHAD (KODIKA): SISTEM PEMUNGUT PEMANGKIN KEJAYAAN

Oleh:
Nor Aslamiah Ali
Rosidah Rashid

PENGENALAN

Negeri **Terengganu** Darul Iman adalah salah sebuah negeri dalam Malaysia yang terletak di Pantai Timur Semenanjung Malaysia. Ia terletak di bahagian utara dan barat laut bersempadan dengan Kelantan manakala di bahagian selatan dan barat daya pula bersempadan dengan Pahang.

Sumber ekonomi utama bagi negeri Terengganu adalah hasil galian petroleum yang berpusat di Kerteh, Terengganu. Namun kini menjelang 2012, kerajaan negeri giat memperkasakan sektor pelancongan sebagai alternatif sumber ekonomi bagi menggantikan hasil daripada petroleum yang semakin menyusut justeru menjadikan sektor pelancongan di Terengganu sebagai teras kepada ekonomi Terengganu. Sistem pengkoperasian juga merupakan penyumbang kepada kepesatan ekonomi di Terengganu misalnya penubuhan Koperasi Adik Kakak Kampung Pulau Rusa Kuala Terengganu Berhad yang dananya berjaya dikumpulkan sehingga mencecah lebih RM5-6 juta pada tahun 2009.

SEJARAH PENUBUHAN KOPERASI ADIK KAKAK KAMPUNG PULAU RUSA KUALA TERENGGANU (KODIKA) BERHAD

Sejarah penubuhan koperasi ini bermula daripada satu pakatan yang ditubuhkan dengan asas sistem “permainan kutu”. Idea untuk mengubah bentuk pakatan ini kepada sebuah pertubuhan telah lahir daripada seorang guru di Sekolah Kebangsaan Paloh iaitu Cikgu Haji Wan Abdullah bin Ali. Maka ia berjaya direalisasikan setelah satu pakatan yang melibatkan lima orang termasuklah beliau sendiri telah bersepakat mewujudkan Tabung Simpanan dan Pinjaman Kampung Pulau Rusa (TSP) pada 1 Ogos 1971.



Pada peringkat ini, TSP hanya dianggotai oleh dua orang guru Sekolah Kebangsaan Paloh, seorang kerani, seorang tukang kebun dan seorang tukang sapu Sekolah Kebangsaan Paloh. Lima orang ahli terawal yang dianggap sebagai pengasas TSP ialah Cikgu Haji Wan Abdullah bin Ali (Ahli No.1) selaku Pengerusi, Cikgu Muhammad bin Ismail (Ahli No.2), En. Mustapha@Harun bin Ismail (Ahli No.3) selaku setiausaha, En. Ahmad bin Embong (Ahli No.4) dan En. Abdul Rahman bin Haji Taib (Ahli No.5). Antara tujuan asal pakatan yang membawa kepada tertubuhnya TSP ialah untuk mengelakkan ahli daripada terpaksa menggunakan khidmat pajak gadai apabila memerlukan wang untuk keperluan tertentu. Ini adalah kerana pajak gadai dikatakan mengenakan bayaran “bunga” (faedah) yang tinggi dan sudah tentulah membebankan si penggadai. Ia juga bertujuan agar ahli-ahli dapat membeli barang-barang dengan harga yang lebih murah. Jika sebelum ini, ahli-ahlinya membeli dengan cara ansuran kerana tidak mempunyai wang yang cukup, dengan adanya TSP ahli-ahli boleh membeli dengan cara bayaran tunai.

Pada asasnya, TSP diwujudkan untuk membolehkan ahli-ahli mengamalkan tabiat menabung iaitu dengan cara menyimpan sebahagian wang daripada pendapatan harian atau bulanan untuk kegunaan apabila keadaan memerlukan. Dengan adanya TSP di Kampung Pulau Rusa akan membolehkan ahli-ahlinya menggunakan kemudahan pinjaman wang untuk menjana kegiatan ekonomi mereka terutamanya di kalangan pengusaha batik dan songket dan juga peniaga-peniaga lain. Pada peringkat awalnya, pinjaman diberikan secara bergilir-gilir setiap bulan tetapi setelah bilangan keahlian bertambah didapati sumber kewangan adalah terhad. Justeru, bermulalah era baru iaitu pinjaman tidak lagi berbentuk sistem permainan kutu. Sebaliknya akan diberi kepada ahli yang memohon untuk mendapatkan pinjaman apabila perlu. Bagi kawalan kewangan, Jawatankuasa Pengurusan TSP telah menetapkan had kelayakan pinjaman maksimum mengikut simpanan ahli dalam tabung dan yuran bulanan. Ini menunjukkan TSP sekali lagi bergerak sebagai sebuah koperasi berdaftar. Ini menyebabkan TSP popular dengan panggilan “Koperatif Pulau Rusa” dalam kalangan ahli-ahlinya. Setiap pinjaman yang diberikan kepada ahli dikenakan bayaran perkhidmatan sebanyak $\frac{1}{2}\%$ sebulan berdasarkan kepada baki pinjaman. Selepas tahun 1977, kadar bayaran perkhidmatan telah diubah kepada 4% daripada jumlah pinjaman dan bukan lagi berdasarkan kepada baki bulanan.

Satu lagi tujuan penubuhan TSP seperti yang tercatat pada Perlembagaan KSP 1976 ialah untuk mewujudkan semangat perpaduan dan kerjasama dalam kalangan penduduk kampung atau kawasan mukim tersebut. Ini juga merupakan bukti bahawa TSP mampu memupuk semangat kerjasama dalam kalangan ahli-ahlinya.



Bagi melancarkan lagi urusan pentadbiran TSP, maka ianya telah didaftar sebagai sebuah koperasi yang diberi nama “Koperasi Adik Kakak Kampung Pulau Rusa Kuala Terengganu (KODIKA) Berhad” pada 16 Januari 1994 dengan keanggotaan semasa didaftarkan adalah seramai 328 orang iaitu keahlian asal TSP. Dinamakan sebagai Koperasi Adik Kakak kerana kebanyakan anggota-anggotanya adalah bersaudara.

LATAR BELAKANG KOPERASI



Pejabat operasi KODIKA

Koperasi Adik Kakak Kampung Pulau Rusa Kuala Terengganu Berhad yang lebih dikenali sebagai KODIKA merupakan sebuah koperasi yang menjalankan aktiviti kredit sejak penubuhannya. Koperasi ini dianggotai oleh penduduk Kampung Pulau Rusa yang berjumlah seramai 2500 orang. Lokasi kampung ini terletak 5 kilometer dari Bandar Kuala Terengganu. Pada masa ini, KODIKA beroperasi di Lot PT 1900, Tingkat Atas, Rumah Kedai KP Perdana, Mukim Kubang Parit, 20050 Kuala Terengganu.

KODIKA antara koperasi yang berjaya di negeri Terengganu dan ia telah dianugerahkan Sijil Penarafan Koperasi (FLAME-T) 5 Bintang bagi tahun 2010-2012 oleh Suruhanjaya Koperasi Malaysia (SKM) melalui pengauditan yang dijalankan. Pengiktirafan ini diberikan atas kejayaan KODIKA menguruskan kutipan hutang daripada anggota sehinggakan KODIKA tidak mempunyai sebarang hutang lapuk (NPL=0).



Matlamat Penubuhan KODIKA

Matlamat KODIKA adalah untuk meningkatkan kepentingan ekonomi anggota mengikut prinsip-prinsip koperasi. Sesuai juga dengan namanya yang unik, koperasi ini lebih mengutamakan anggota daripada keuntungan koperasi.

Tujuan KODIKA ialah untuk:

- menggalakkan jimat cermat dan menyimpan
- memberi pinjaman wang tunai
- pembiayaan skim pengguna
- memberi pinjaman pelajaran
- memberi pinjaman untuk menambahkan modal syer
- membantu anggota mendapatkan tanah dan rumah kediaman
- mewujudkan perpaduan dan menjaga kebajikan di kalangan anggota

Keanggotaan

Keanggotaan koperasi ini terdiri daripada penduduk Kampung Pulau Rusa yang kebanyakannya adalah kakitangan kerajaan dan swasta, suri rumah, bekerja sendiri, pelajar dan pesara. Keanggotaannya tidak memihak kepada mana-mana parti politik dan jelas bertepatan dengan ciri-ciri sebuah koperasi iaitu “Koperasi bukannya pertubuhan politik. Anggotanya tidak boleh menggunakan koperasi sebagai tempat berpolitik”.

Keanggotaan KODIKA semakin meningkat dari tahun ke tahun iaitu pada Disember 1994 keanggotaannya adalah seramai 565 orang dan terus meningkat sehingga Jun 2011 iaitu seramai 1,281 orang.

PENTADBIRAN DAN PENGURUSAN KOPERASI

KODIKA terdiri daripada 12 orang ALK iaitu Pengerusi, Naib Pengerusi, Setiausaha, Bendahari, Penolong Setiausaha dan tujuh orang Anggota Lembaga. Dalam kalangan ALK, terdapat dua jawatankuasa kecil iaitu Jawatankuasa Kecil Pelaburan dan Jawatankuasa Kecil Tabung Kebajikan Am. Pelantikan ALK tertakluk kepada pemilihan yang dibuat oleh anggota koperasi semasa Mesyuarat Agung Tahunan. Tanggungjawab ALK adalah memastikan perjalanan aktiviti koperasi berjalan dengan baik dan memastikan kebajikan anggota terjaga.




Barisan Anggota Lembaga KODIKA

Kuasa Tertinggi koperasi adalah Mesyuarat Agung Tahunan (MAT) yang diadakan pada setiap tahun. Laporan kemajuan dan laporan kewangan dibentangkan dalam mesyuarat ini, manakala Mesyuarat Anggota Lembaga Koperasi (ALK) diadakan pada setiap akhir bulan. Lazimnya mesyuarat ini dijalankan di rumah-rumah ALK secara bergilir-gilir tanpa melibatkan sebarang perbelanjaan mesyuarat iaitu belanja makan minum ditanggung oleh ALK itu sendiri. Ini menunjukkan komitmen ALK kepada koperasi tanpa memikirkan elaun mesyuarat. Mereka hanya dibayar elaun tahunan yang telah dipersetujui di dalam MAT. Agenda tetap mesyuarat ALK adalah perbincangan dan mendapat maklum balas dari ALK tentang kemajuan aktiviti dan projek koperasi. Lain-lain agenda adalah:

- Menimbang permohonan kemasukan anggota baru
- Membincang laporan kewangan setiap bulan
- Menimbang dan meluluskan permohonan pinjaman wang, pinjaman pengguna dan sumbangan kebajikan
- Membincang aktiviti projek baru
- Membincang aktiviti pelaburan
- Perbincangan hal-hal lain berkaitan kemajuan koperasi

Selain ALK, KODIKA juga mempunyai pemungut yang berfungsi sebagai perantara antara anggota dan koperasi. Mesyuarat Jawatankuasa Pemungut diadakan apabila perlu. Agenda mesyuarat adalah mendapat maklum balas berkaitan pungutan wang koperasi dan menjadi penghubung atau pengantara untuk menyampaikan maklumat koperasi kepada anggota.



Rajah I : Struktur Organisasi KODIKA

Tugas-tugas pentadbiran dilaksanakan oleh seorang pengurus sahaja yang merupakan anak jati Kampung Pulau Rusa. Beliau telah berkhidmat selama 17 tahun bermula 1995 sehingga sekarang dan berprinsip “Kalau kita tak buat, siapa lagi nak tolong koperasi”. Beliau banyak bergantung kepada “Sistem Berkomputer Pengurusan Maklumat Rekod Yuran dan Pinjaman Anggota”. KODIKA juga mempunyai sebuah komputer dengan kemudahan Internet, mesin pencetak dan mesin faks.

SISTEM PEMUNGUT

KODIKA mempunyai satu sistem unik yang telah diamalkan sejak awal penubuhannya lagi iaitu “Sistem Pemungut”. Keunikan pengurusan kegiatan kredit melalui pemungut mungkin hanya terdapat di koperasi ini sahaja. Ia adalah satu kaedah untuk mendapatkan modal




yuran, bayaran balik pinjaman dan juga sumbangan kebajikan dari anggota. Anggota yang meminjam tidak perlu datang ke pejabat koperasi untuk membuat bayaran sebaliknya bayaran dibuat terus kepada pemungut. Malah pemungut juga sebagai perantara anggota dengan KODIKA untuk menyampaikan maklumat-maklumat koperasi, menyalurkan maklumat dan maklum balas anggota. Pemungut terdiri daripada anggota yang dilantik oleh ALK. Sebelum seseorang anggota dilantik sebagai pemungut, beberapa kriteria diperlukan:

- 1) Anggota yang disegani dalam kalangan kumpulan keluarga
- 2) Jujur,
- 3) Amanah,
- 4) Bertanggungjawab,
- 5) Berkhidmat secara sukarela dan
- 6) Mesti mempunyai komitmen yang tinggi dengan tugas yang diberi.

Setiap pemungut diberikan imbuhan atau sagu hati sebanyak RMI bagi seorang anggota pada setiap sebulan. Sehingga kini terdapat seramai 30 orang pemungut termasuk daripada kalangan ALK sendiri. Setiap pemungut mempunyai jumlah bilangan anggota yang berbeza. Kebiasaannya, kumpulan anggota dalam setiap pemungut adalah mereka yang ada hubungan kekeluargaan atau kejiranan yang hampir dengan pemungut dengan syarat pemungut mesti bersetuju anggota tersebut berada di dalam kumpulannya.

Proses pungutan ini berjalan pada setiap awal bulan iaitu pengurus koperasi akan menyediakan senarai tuntutan bulanan untuk diagihkan kepada pemungut mengikut kumpulan anggota yang ditetapkan. Dalam senarai tuntutan itu, dicatatkan amaun yang dituntut oleh koperasi daripada setiap anggota di bawahnya. Senarai pungutan ini diberi kepada pemungut pada akhir bulan dan hasil kutipan sepenuhnya diserahkan kepada pengurus koperasi sebelum 10 hari bulan berikutnya. Pengurus koperasi pula akan memasukkan hasil kutipan tersebut ke bank. Begitulah pentingnya peranan pemungut kepada koperasi ini. Selain daripada itu, sistem ini juga dilihat dapat merapatkan lagi silaturahim antara penduduk Kampung Pulau Rusa.



Rajah 2: Prosedur Pungutan Bulanan

Kebaikan Sistem Pemungut

- 1) KODIKA tidak mempunyai masalah dalam soal bayaran balik pinjaman, modal yuran dan sumbangan kebajikan daripada anggota.
- 2) Pemungut bertanggungjawab sepenuhnya dalam memastikan bayaran balik pinjaman anggota di bawahnya mencukupi sebelum diserahkan kepada koperasi.
- 3) Anggota akan menjelaskan bayaran mengikut masa yang ditetapkan kerana adanya perasaan segan (malu mata) anggota kepada pemungut. (Setiap anggota yang hendak membuat pinjaman hendaklah mendapat pengesahan dan persetujuan daripada pemungut masing-masing sebelum pinjaman mereka diluluskan. Kemudian barulah pinjaman tersebut diluluskan dalam Mesyuarat ALK dan seterusnya pembayaran melalui cek dilakukan oleh pegawai koperasi)



SUMBER KEWANGAN

KODIKA tidak membuat pinjaman dari bank dan juga tidak menerima geran atau bantuan kewangan dari SKM. KODIKA menjalankan aktiviti utamanya iaitu kredit melalui sumber seperti:

Fi Masuk

KODIKA mengenakan fi masuk sebanyak RM30 kepada setiap anggota yang telah disahkan menjadi anggota dan sebanyak RM100 akan dikenakan jika anggota telah keluar dari KODIKA dan masuk semula sebagai anggota buat kali ke dua.

Modal Syer

Modal syer minimum sebanyak RM300 akan dikenakan kepada setiap anggota dan tiada had maksimum bagi modal syer. Bagi anggota yang tidak mampu menyumbang modal syer untuk sekali bayaran, mereka juga boleh membuat ansuran sehingga sampai ke jumlah minimum. Kebanyakan anggota akan cuba menambah modal syer mereka kerana kelayakan jumlah pinjaman perkhidmatan pengguna berdasarkan jumlah modal syer. Sebanyak RM 1,927,773.19 modal syer telah dapat dikumpulkan oleh KODIKA setakat 30 Jun 2011, jumlah ini meningkat setiap tahun disebabkan penambahan keanggotaan dan jumlah modal syer yang dibuat oleh anggota.

Modal Yuran

KODIKA mengutip modal yuran minimum sebanyak RM20 sebulan dan tiada had maksimum. Modal yuran merupakan simpanan kepada anggota dan jumlah pinjaman yang dimohon juga akan bergantung kepada jumlah modal yuran anggota. Sehingga 30 Jun 2011, KODIKA telah berjaya mengumpul modal yuran sebanyak RM5,769,340 berbanding pada tahun 31 Disember 1994 sebanyak RM 882,435. Jumlah ini meningkat setiap tahun dengan pertambahan anggota dan kebanyakan anggota menyumbang lebih daripada jumlah minimum yang telah ditetapkan.

Yuran Tabung Kebajikan Am

Yuran tabung kebajikan am sebanyak RM1 akan dikenakan kepada setiap anggota bagi setiap bulan dan digunakan untuk menampung aktiviti kebajikan KODIKA.



AKTIVITI KOPERASI

Aktiviti utama KODIKA adalah kredit di samping projek pembangunan hartanah sebagai perkhidmatannya kepada anggota dan sebagai sumber pendapatan. KODIKA juga memberikan sumbangan kebajikan kepada anggota yang memerlukan.

Kredit

Setiap anggota layak memohon pinjaman dengan syarat telah menjadi anggota selama enam bulan dan memenuhi modal syer minimum. Terdapat empat jenis pinjaman yang dikeluarkan iaitu :

Pinjaman Wang Tunai

Anggota layak membuat pinjaman sebanyak tiga kali jumlah simpanan modal yuran dan maksimum sebanyak RM20,000 atau mana yang kurang. Pinjaman ini hendaklah dibayar balik secara ansuran selama maksimum 40 bulan. Bayaran perkhidmatan akan dikenakan sebanyak 5% ke atas setiap pinjaman. Sehubungan dengan itu, merujuk kepada akaun pengurusan KODIKA, bermula pada Februari 1994 sehingga Jun 2011 jumlah pinjaman wang tunai yang telah dikeluarkan adalah 3,476 iaitu sebanyak RM 31,716,638.

Kebiasaan pinjaman wang tunai dibuat untuk keperluan :

- Tambah modal perniagaan /perusahaan
- Membaiki rumah
- Perubatan
- Pelaburan
- Pendahuluan biaya kenderaan
- Peniaga kecil / penjaja
- Kegunaan peribadi
- Persiapan perkahwinan

Pinjaman Perkhidmatan Pengguna

Lazimnya pinjaman perkhidmatan pengguna untuk anggota yang ingin membuat pembelian sesuatu barangan keperluan. Jumlah layak dipinjam adalah sebanyak lima kali jumlah modal syer sehingga maksimum RM25,000 atau mana yang kurang. Tempoh bayaran balik pula selama maksimum 40 bulan dan bayaran perkhidmatan yang dikenakan sebanyak 8% ke atas harga kos sesuatu barangan yang dibeli. Sehingga Jun 2011, jumlah pinjaman perkhidmatan



pengguna adalah sebanyak 208 bersamaan RM 3,186,065.24. Pinjaman perkhidmatan pengguna selalunya dibuat untuk pembelian :

- Tanah dan rumah
- Komputer
- Kenderaan
- Barang kemas
- Perabot
- Alatan letrik

Pinjaman Pelajaran

Pinjaman pelajaran layak dibuat oleh anggota atau anak anggota yang telah mendapat tempat di Institut Pengajian Tinggi (IPT). Kelayakan maksimum ialah sebanyak RM4,000 kepada setiap pelajar dan bayaran balik pinjaman secara ansuran selama maksimum 40 bulan. Bayaran perkhidmatan yang dikenakan adalah sebanyak 5% ke atas setiap pinjaman. Sehingga bulan Jun 2011, KODIKA telah mengeluarkan sebanyak 31 pinjaman pelajaran dengan nilai sebanyak RM96,000 dan jumlah pinjaman yang belum dijelaskan adalah sebanyak RM33,700.

Pinjaman Modal Syer

Pinjaman modal syer bertujuan untuk anggota menambah modal syer sedia ada. Jumlah pinjaman yang layak adalah tiga kali jumlah modal yuran sehingga maksimum sebanyak RM5,000 dan bayaran balik pinjaman secara ansuran selama maksimum 40 bulan. Bayaran perkhidmatan pula sebanyak 4% ke atas setiap pinjaman. Sehingga bulan Jun 2011 sebanyak enam pinjaman telah diluluskan dengan nilai sebanyak RM29,000.

SUMBANGAN KEBAJIKAN KEPADA ANGGOTA

Di samping memberi perkhidmatan pinjaman kepada anggota, KODIKA juga memberikan sumbangan kebajikan kepada anggotanya. Sumber kewangan ini diambil daripada kutipan sumbangan kebajikan am sebanyak RM1 sebulan yang dikenakan ke atas setiap anggota.



Jadual 7: Jenis Sumbangan yang Diterima oleh Anggota

Jenis Sumbangan	Kadar Sumbangan
Khairat kematian anggota	RM 800.00
Kematian waris terdekat anggota	RM 400.00
Bencana alam (kebakaran, ribut, banjir)	RM1000.00
Sumbangan kepada pelajar (anggota atau anak anggota yang berjaya ke IPT)	RM 200.00
Menunaikan fardu haji	RM 200.00
Melangsungkan perkahwinan	RM 100.00
Kemasukan ke hospital @ RM20.00 /hari (max. 15 hari)	RM 300.00
Hadiah kenangan semasa MAT	RM20.00-RM25.00

Projek Pembangunan Hartanah

KODIKA berusaha mencari jalan untuk membantu anggota yang belum memiliki tanah dan rumah kediaman. Setakat ini KODIKA telah berjaya menjual empat unit rumah banglo setingkat kepada anggotanya melalui projek pemajuan perumahan di Kampung Tok Jembal. KODIKA telah membeli sebidang tanah seluas empat ekar di Kampung Tok Jering, Kuala Terengganu dan sedang dimajukan untuk projek perumahan yang akan dijual kepada anggota.

Projek terkini, KODIKA sedang menimbus dua bidang tanah dan memecahkan kepada 13 lot tanah di Kampung Pusu Tiga, Gong Badak dan 24 lot tanah di Lot 585, Alor Purong Mukim Serada. Tanah-tanah yang telah dipecahkan ini akan dijual kepada anggota dengan harga yang berpatutan. Anggota yang mampu boleh membeli terus daripada KODIKA atau bagi yang tidak mampu mereka boleh membuat pinjaman wang tunai daripada KODIKA. Semua tanah yang dimajukan dibeli secara tunai dan bukan tanah anugerah daripada kerajaan.





PENCAPAIAN KOPERASI

Pencapaian di dalam Untung Rugi

Pemungut memainkan peranan yang amat penting untuk memastikan semua kutipan bayaran balik pinjaman dan yuran dari anggota KODIKA dapat dijelaskan tanpa sebarang tunggakan. Di samping itu, KODIKA sentiasa mengutamakan perkhidmatan kepada anggota sehinggakan anggota mempunyai rasa kepunyaan dan bertanggungjawab untuk memberikan komitmen bayaran balik pinjaman yang dibuat. Hasilnya KODIKA tidak mempunyai sebarang hutang lapuk dan mencatatkan keuntungan setiap tahun.

Sehingga bulan Jun 2011, KODIKA telah mencatatkan keuntungan bersih sebanyak RM252,392.29, dengan keuntungan ini membolehkan KODIKA membayar dividen kepada anggotanya sebanyak 10% iaitu sebanyak 8% ke atas modal syer dan 2% ke atas modal yuran.

Anugerah

Kejayaan KODIKA dibuktikan dengan pelbagai penganugerahan yang berprestij daripada pelbagai agensi. Antara anugerah yang telah diterima ialah :

- Anugerah Koperasi Kredit Terbaik 2001 (Peringkat Negeri Terengganu)
- Anugerah Pegawai Koperasi Terbaik 2006 (Peringkat Negeri Terengganu)
- Sijil Penarafan Koperasi (FLAME-T) 5 Bintang bagi tahun 2010-2012 (SKM)
- Anugerah Inovasi & Kreativiti Hari Koperasi Negara 2010 (Peringkat Nasional)




ALK KODIKA bersama YB Dato' Sri Ismail Sabri bin Yaakob,
Menteri PDNKK dalam penyampaian Anugerah
Inovasi & Kreatif pada Hari Koperasi Negara 2010



Kejayaan Anggota KODIKA

Kejayaan KODIKA dibuktikan melalui kelahiran 44 orang usahawan yang berjaya daripada kalangan anggotanya. Anggota memperoleh sumber modal perniagaan daripada pinjaman yang dibuat dengan KODIKA kerana caj minimum yang rendah berbanding dengan faedah yang dikenakan oleh bank komersil. Mereka berpendapat bahawa dengan membuat pinjaman dengan KODIKA, secara tidak langsung dapat membantu anggota-anggota yang lain. Antara perniagaan yang dijalankan seperti kedai cermin mata, tayar, roti, alat tulis, perkakasan, barangan kemas dan foto. Ada juga anggota membuka butik, bengkel kereta dan menjadi kontraktor. KODIKA percaya kejayaan anggota melambangkan kejayaan koperasi.



PERANCANGAN DAN PROSPEK MASA DEPAN

KODIKA merangka beberapa strategi untuk bergerak maju seiring dengan kehendak kerajaan supaya koperasi dapat menyumbang sebanyak 5% kepada KDNK. Antara perancangan KODIKA untuk merealisasikan kehendak tersebut, KODIKA bercadang untuk :



- Mempunyai bangunan sendiri
- Menjalinkan usaha sama dengan anggota koperasi yang berjaya dalam aktiviti-aktiviti tertentu.
- Meneruskan projek hartanah
- Menceburi projek pertanian dan perdagangan
- Memberikan perkhidmatan pengangkutan
- Memberikan khidmat nasihat dan runding cara

KESIMPULAN

Sebagai sebuah koperasi yang ditubuhkan oleh orang kampung, KODIKA ternyata telah menunjukkan prestasi yang sangat cemerlang di Malaysia. Dengan memegang Prinsip “Teguhnya koperasi adalah saling percaya dan mempercayai dalam kalangan anggota serta kerjasama yang padu daripada setiap anggota”, maka, penyelewengan tidak akan berlaku sekiranya setiap individu dapat memperkasakan sifat-sifat terpuji seperti jujur dan amanah serta tanggungjawab terhadap koperasi.

Memandangkan anggota koperasi terdiri daripada sebuah bilangan yang agak besar, maka faktor dalaman perlu diambil kira bagi memastikan penstrukturan dan pentadbiran koperasi berjalan dengan lancar. Bahkan, komitmen dan tanggungjawab setiap anggota terhadap koperasi sendiri perlu dititikberatkan agar koperasi mampu berdaya saing dan sentiasa maju ke hadapan seiring dengan perkembangan ekonomi negara.

Demikian, KODIKA mampu bergerak maju untuk meningkatkan sosioekonomi, budaya dan sosial anggota dengan pegangan prinsip koperasi serta nilai-nilai koperasi yang tinggi di dalam setiap anggota koperasi tersebut, di samping membina muafakat antara masyarakat majmuk.



Kisah
**KEJAYAAN KOPERASI
DI MALAYSIA**